



百氏文集

四十四卷

~ 16
3345
22



門 16
號 3345
卷 22



白氏長慶集卷第四十二

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫按

墓誌銘凡七首

大唐故賢妃京兆韋氏墓誌銘

德宗聖文神武皇帝元妃韋氏諱某字某京兆人也曾祖某某官祖某某官父某某官妃即某官府君第某女也母曰永穆公主元和四年四月某日妃薨于某所以其年四月某日詔葬于萬年縣上好里洪平原上悼焉

昭和卅一年十二月二十日
原安三郎氏贈

哀榮之禮有以加焉嗚呼惟韋氏代德官業族系婚戚
 有國史家謀存焉今奉詔但書地及時與妃之所以曰
 賢之義而已貞元中沙鹿上仙長秋虛位凡六十九御
 之政多聽於妃妃先以采蘋之誠奉于上故能致霜露
 之感薦于九廟次以樛木之德逮于下故能分雲雨之
 澤洽于六宮其餘坐論婦道行贊內理服用必中度故
 組物切五詳倫紉詳倫有常訓言動必中節故環珮有常聲七
 十二年禮無違者冊命曰賢不亦宜哉貞元中號奉宮
 車誓留園寢麻衣告朔蓬首致哀執匪懈之心視奠於
 靈坐修無上之道薦福于崇陵始茲歿身不衰其志故

葬之日掌文之臣白居易得以無媿之詞誌于墓而銘
 曰

京兆阡兮洪平原兮歲已丑兮今日丁酉兮惟土田兮與
 時日龜兮著昔兮借言吉峨峨新墳兮葬者誰德宗皇帝
 韋賢妃

唐故會王墓誌銘序

唐元和五年冬十一月四日會王寢疾薨于內邸大小
 斂之日上皆不舉樂不坐朝恩也越十二月十八日詔
 京兆尹潘監視葬事定于萬年縣崇道鄉西趙原禮也
 是日又詔翰林學士白居易為之銘誌故事也王諱纁

字某德宗之孫順宗之子陛下之弟幼有令德早承寵
 章未冠而王受封曰會夫以祖功宗德之慶又天兄日
 之貴胄土列藩之寵好德樂善之賢宜乎壽考福延為
 王室輔鳴呼降年不永二十一而終哀哉皇帝厚惇睦
 之恩深友悌之愛故王之薨也軫悼之念有加於常情
 王之葬也遣奠之儀有加於常數哀榮兼備斯其謂乎

銘曰

歲在寅月窮紀萬年縣崇道里會王薨葬於此

故滁州刺史贈刑部尚書榮陽鄭公墓誌銘

周宣王封母弟桓公于鄭厥後因封命氏為榮陽人鄭

自桓公而下平簡公而上世家婚嗣咸詳于史謀故不
 書公諱某字某五代祖諱某北齊尚書令是為平簡公
 曾祖諱某下邳郡太守王父諱某衛州刺史王考諱某
 秘書郎贈鄭州刺史公即秘書第三子好學攻詞賦進
 士中第判入高等始授郟城尉無何本郡守移他鄉州
 民有暴悖者相率遮道麾訶不去公忿其犯上立斃六
 士人採訪使奇之奏署支使改浚儀主簿轉大理評事
 兼佐漕務彭果領五府奏公為節度判官會果坐賊連
 累僚佐貶光化尉移向城尉歷北海時安祿山始亂傳
 檄郡邑邑民孫俊鄧犀伽毆市人劫廩藏以應公時已

去秩因奮呼率僚吏子弟急擊之殺俊犀伽盡殲其黨
繇是一邑用寧朝廷美之擢授登州司馬尋轉長史累
加朝散大夫入爲太子左贊善大夫尚書屯田員外郎
太子中允出攝淄州刺史俄換萊州連有善最詔授檢
校司勳郎中兼侍御史充青萊登海密五州租庸使太
尉李公光弼鎮徐州奏公爲徐州刺史充海密沂三州
招討使加正議大夫賜紫金魚袋公威惠舊著比至部
而蒼山賊帥李浩與其徒五千來降繇是三郡底定復
入爲衛尉少卿相國王公縉統河南奏公爲副元帥判
官未幾除祕書少監兼滁州刺史本州團練使居八載

政績大成大曆十二年二月十五日薨于揚州權窆于
某所享年七十有八公凡七佐軍四領郡祿俸不積滯
衣食無常主常嘆曰以飽暖活孀幼以清白貽子孫是
吾心也逮啓手足卒如其志先是太夫人常寢疾公衣
不解髮不櫛者彌年侍疾執喪憂毀過禮公猶善五言
詩與王昌齡王之煥崔國輔輩聯唱迭和名動一時逮
今著樂詞播人口非一晚賦思舊遊詩百篇亦傳於代
前夫人清河崔氏贈清河郡太君後夫人博陵崔氏贈
博陵郡君生子七人女七人長子雲遠有才名官至刑
部侍郎京兆尹公由京兆累贈至散騎常侍刑部尚書

次子微終潤州司馬次子公達有至行初公年高就養
 不仕及居憂廬墓泣血三年淮南節度使本道黜陟使
 泉朝賢袁高高參等累以孝悌稱薦嚮名教者慕之今
 為侍御史上柱國滄景節度參謀次子方達衡州司士
 參軍次子震當陽丞次子文弼幽州參軍次子安達率
 府倉曹參軍公自捐館舍殆逾三紀家國多故未克反
 墓至元和二年月日始遷兆於鄭州新鄭縣某原祔先
 祕書瑩二夫人從焉時京兆已即世諸弟在下位獨侍
 御史銜恤襄事孝備始終見託述撰銘于墓石銘曰
 世祿德門斯之謂可久懿文茂績斯之謂不朽二千石

之祿七十八之年斯之謂貴壽內史之顯揚柱史之孝
 行斯之謂有後嗚呼鄭公榮如是哀如是又何不足之
 有

唐河南元府君夫人榮陽鄭氏墓誌銘

有唐元和元年九月十六日故中散大夫尚書比部郎
 中舒王府長史河南元府君諱寬夫人榮陽縣太君鄭
 氏年六十寢疾歿于萬年縣靖安里私第越明年二月
 十五日權祔于咸陽縣奉賢鄉洪瀆原從先姑之塋也
 夫人曾祖諱遠思官至鄭州刺史贈太常卿王父諱曠
 於蓋朝散大夫易州司馬父諱濟睦州刺史夫人睦州

次女也其出范陽盧氏外祖諱平子京兆府涇陽縣令
 夫人有四子二女長曰沂蔡州汝陽尉次曰桓京兆府
 萬年縣尉次曰積同州韋城尉次曰稹河南縣尉長女
 適吳郡陸翰翰為監察御史次為比丘尼名真二女
 不幸皆先天人歿府君之為比部也夫人始封榮陽縣
 君從夫貴也稹之為拾遺也夫人進封榮陽縣大君從
 子貴也天下有五甲姓榮陽鄭氏居其一鄭之勲德官
 爵有國史在鄭之源流婚媾有家謀在比部府君世祿
 官政文行有故京兆尹鄭雲逵之誌在今所叙者但書
 夫人之事而已初夫人為女時事父母以孝聞友兄弟

睦弟妹以梯聞發自生知不由師訓其淑性有如此者
 夫人為婦時元氏世食貧然以豐潔家祀傳為詒燕之
 訓夫人每及時祭則終夜不寢煎和滌濯必躬親之雖
 隆暑沍寒之時而服勤親饋面無怠色其誠敬有如此
 者元鄭皆大族好合而姻表滋多凡中外吉凶之禮有
 疑議者皆質於夫人夫人從而酌之靡不中禮其明達
 有如此者夫人為母時府君既沒積與積方鄰家貧
 無師以授業夫人親執書誨而不倦四五年間二子皆
 以通經入仕積既第判入等授祕書省校書郎屬今天
 子始踐祚策三科以拔天下賢俊中第者凡十八人積

冠其首焉由校書郎拜左拾遺不數月讜言直聲動於
 朝廷以是出為河南尉長女既適陸氏陸氏有舅姑多
 姻族於是以順奉上以惠逮下二紀而歿婦道不衰內
 外六姻仰為儀範非夫人恂恂孜孜善誘所至則曷能
 使子達於邦女宜其家哉其教誨有如此者既而諸子
 雖迭仕祿賜甚薄每至月給食時給衣皆始自孤弱者
 次及疎賤者由是衣無常主厨無異膳親者悅疎者來
 故傭保乳母之類有凍餒坐白不忍去元氏之門者而
 况臧獲輩乎其仁愛有如此者自夫人歿其家殆二十
 五年專用訓誡除去鞭扑常以正顏色訓諸女婦諸女

婦其心戰兢如履於冰常以正辭氣誡諸子孫諸子孫
 其心愧恥若撻于市由是納下於少過致家於大和婢
 僕終歲不聞忿爭童孺成人不識槓楚閨門之內熙熙
 然如太古時人也其慈訓有如此者噫昔漆室緹縈之
 徒烈女也及為婦則無聞伯宗梁鴻之妻哲婦也及為
 母則無聞文伯孟氏之親賢母也為女為婦時亦無聞
 今夫人女美如此婦德又如此母儀又如此三者具美
 可謂冠古今矣嗚呼惟夫人道移於他則何用而不臧
 乎若引而伸之可以肥一國焉則關雎鵲巢之化斯不
 遠矣若推而廣之可以肥天下焉則姜嫄文母之風斯

不遠矣。豈止於訓四子以聖善化一家於仁厚者哉。居易不佞辱與夫人幼子積為執友。故聆夫人美最熟。積泣血號慕哀動他人。託為撰述書于墓石。斯古孝子顯父母之志也。嗚呼斯文之作豈直若是而已哉。亦欲百代之下聞夫人之風。過夫人之墓者使悍妻和歸。毋慈不遜之女。順云爾。銘曰

元和歲丁亥春咸陽道渭水濱云誰之墓鄭夫人

唐揚州倉曹參軍王府君墓誌銘 代裴頌舍人作

公諱某字士寬其先出自周靈王太子晉凡二十一代而生翦翦為將軍又三世而生珣珣居太原故今為太

原人又十九代而生瓊瓊為後魏僕射謚孝簡公又二代而生曾祖諱滿官為河南府王屋縣令王父諱大璉為嘉州司馬父諱昇為京兆府咸陽令河南府伊闕令有文行學術應制舉對沈謀祕略策登科詩入正聲集公即伊闕第三子好學善屬文天寶中應明經舉及第選授婺州義烏尉以清幹稱刺史韋之晉知之署本州防禦判官無何租庸轉運使元載又知之假本州司倉專掌運務歲終課績居多遂奏聞真授永泰中勅遷越府戶曹屬邑有不理者公假領之所至必理大曆中本道觀察使薛兼訓以公清白尤異表奏之有詔權知餘

白集 卷四十二
姚縣令時海寇初殄邑焚田荒公乃營邑室創器用復
流庸闢菑畝凡江南列邑之政公冠其首其制邑闢田
增戶之績則會稽之謀地官之籍載焉建中初選授揚
州倉曹參軍至五年七月二十六日疾歿于江陽縣之
私第春秋六十二夫人清河崔氏鳳閣舍人融之姪孫
鄭州司戶法昂之女婦順母訓中外師之貞元二十年
十一月十三日疾終于三原縣之官舍享年六十二有
子曰播曰炎曰起咸以進士舉及第播應制舉對直言
極諫策授集賢殿校書郎累遷監察殿中侍御史三原
令炎既第未仕起應博學宏詞科選授集賢殿校書郎

昆弟三人不十年而五登甲第時論者榮之一女適范
陽盧仲通播等號護靈輿以永貞元年十月二十五日
遷祔于京兆府富平縣淳化鄉之某原從吉兆也嗚呼
夫懋言行蓄事業俾道積於躬者在人也踐大官贊元
化裨功加于民者由命也有其人無其命雖聖與賢無
可奈何維公受天地之和積為行發為文宜為用故在
家以孝友聞行已以清廉聞蒞事以幹蠱聞如金玉在
珮動而有聲其大者又常以經德秉哲致君濟人為已
任有識者深知之宜乎作王者心膂耳目之官以經緯
其邦家而才為時生道為命屈名雖聞於天子位不過

於陪臣鬱鬱然歿而不展其用者命矣夫古人云有明德大智者若不當世其後必有餘慶今其將在後嗣乎不然何乃德行政事文學之具美聚乎公之三子乎天其或者始將肥王氏之家大王氏之門以甚明報施之道者也其不佞頃對策於王廷也與炎同升諸科焉祇命於憲府也與播聯執其簡焉及為考文之官也又起在選中焉辱與公之三子游而聆公之遺風甚熟故作斯文無隱情無愧辭焉銘曰

淮山道光淮水靈長繩繩子孫代有賢良將軍輔秦武功抑揚孝簡翊魏天德闡彰降及於公實生于唐大智

全才應用無方作椽於郡三語有章承乏於邑一同載康展矣之人何用不臧宜登大位俾紹前芳嗚呼百鍊之金不鑄千將十圍之材不作棟梁公亦如之與世不當道不虛行後嗣其昌

唐故坊州鄜城縣尉陳府君夫人白氏墓誌銘
夫人太原白氏其出昌黎韓氏其適潁川陳氏享年七十唐和州都督諱士通之曾孫尚衣奉御諱志善之女孫都官郎中諱溫之孫延安令諱鏗之第某女韓城令諱欽之外孫故鄜城尉諱潤之夫人故潁川縣君之母故大理少卿襄州別駕諱季庾之姑前京兆府戶曹參

白集 卷四十二
軍翰林學士白居易前秘書省校書郎行簡之外祖母也惟夫人在家以和順奉父母故延安府君視之如子既并以柔正從人故鄜城府君敬之如賓自延安終夫人哀毀過禮為孝女洎鄜城歿夫人撫訓幼女為節婦及居易行簡生夫人鞠養成入為慈祖母迨乎潔菴嘗敬賓客睦娣姒工刀尺善琴書皆出於餘力焉貞元十六年夏四月一日疾歿于徐州古豐縣官舍其年冬十一月權窆于符離縣之南偏至元和八年春二月二十五日改卜宅兆于華州下邽縣義津鄉北原即潁川縣君新塋之西坎從存歿之志居易等號慕慈德敬撰銘

誌泣血秉筆言不成文銘曰

恭惟夫人女孝而純婦節而溫母慈而勤嗚呼謹揚三德銘于墓門恭惟夫人實生我親實撫我身欲養不待仰號蒼旻嗚呼豈寸魚之心能報東海之恩

唐太原白氏之塋墓誌銘

白氏下塋曰幼美小字金剛奴其先太原人高祖諱志善尚衣奉御曾祖諱温都官郎中王父諱鏗河南府鞏縣令先府君諱季庾大理少卿山東別駕先太夫人潁川陳氏封潁川縣君幼美即第四子也既生而惠既孩而敏七歲能誦詩賦八歲能讀書鼓琴九歲不幸遇疾

天徐州符離縣私第貞元八年九月權窆于縣南原元和九年春二月二十五日改葬于華州下邳縣義津鄉北岡祔于先府君宅兆之東三十步其兄居易行簡藐然已孤撫哀臨穴斷手足之痛其心如初且號其銘誌于墓曰

嗚呼剛奴痛矣哉念爾九歲逝不迴埋魂悶骨長夜臺二十年後復一開昔葬符離今下邳魂兮魂兮隨骨來

白氏長慶集卷第四十二

白氏長慶集卷第四十三

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

記序 凡一十二首

江州司馬廳記

自武德以來庶官以便宜制事大攝小重侵輕郡守之職總於諸侯帥郡佐之職移於部從事故自五大都督府至于上中下郡司馬之事盡去唯員與俸在凡內外文武官左遷右移者第居之凡執夜事上與給事於省

寺軍府者進署之凡仕久資高耄昏軟弱不任事而時
 不忍棄者實莅之莅之者進不課其能退不殿其不能
 才不才一也若有人畜器貯用急於兼濟者居之雖一
 日不樂若有人養志忘名安於獨善者處之雖終身無
 悶官不官繫乎時也適不適在乎人也江州左匡廬右
 江湖土高氣清富有任境刺史守土臣不可遠觀遊羣
 吏執事官不敢自暇佚惟司馬綽綽可以從容於山水
 詩酒間由是郡南樓山北樓水溢亭百花亭風篁石巖
 瀑布廬宮源潭洞東西二林寺泉石松雪司馬盡有之
 矣苟有志於吏隱者捨此官何求焉察唐典上州司馬

秩五品歲廩數百石月俸六七萬官足以庇身食足以
 給家州民康非司馬功郡政壞非司馬罪無言責無事
 憂噫為國謀則尸素之尤靈者為身謀則祿仕之優穩
 者予佐是郡行四年矣其心休休如一日二日何哉識
 時知命而已又安知後之司馬不有與吾同志者乎因
 書所得以告來者時元和十三年七月八日記

草堂記

匡廬奇秀甲天下山北峰曰香爐峰北寺曰遺愛寺
 介峰寺間其境勝絕又甲廬山元和十一年秋太原人
 白樂天見而愛之若遠行客過故鄉戀戀不能去因而

峰腋寺作為草堂明年春草堂成三間兩柱二室四牖
 廣袤豐殺一稱心力洞北戶來陰風防徂暑也敞南甍
 納陽日虞祁寒也木斲而已不加丹墻圻而已不加白
 城七計階用石纂牕用紙竹簾紵幃率稱是焉堂中設
 木榻四素屏二漆琴一張儒道佛書各三兩卷樂夫既
 來為主仰觀山俯聽泉傍睨竹樹雲石自辰及酉應接
 不暇俄而物誘氣隨外適內和一宿體寧再宿心恬三
 宿後頽然嗒然不知其然而然自問其故荅曰是居也
 前有平地輪廣十丈中有平臺半平地臺南有方池倍
 平臺環池多山竹野卉池中生白蓮白魚又南極石澗

夾澗有古松老杉大僅十人圍尚不知幾百尺修柯曼
 雲低枝拂潭如幢豎如蓋張如龍蛇走松下多灌叢蘿
 葛葉蔓駢織承翳日月光不到地盛夏風氣如入九月
 時下鋪白石為出入道堂北五步據層崖積石嵌空埕
 塊雜木異草蓋覆其上綠陰蒙蒙朱實離離不識其名
 四時一色又有飛泉植茗就以烹燂齒善切好事者見可
 以永日堂東有瀑布水懸三尺瀉階隅落石渠昏曉如
 練色夜中如環珮琴筑聲堂西倚北岬右趾以剖竹架
 空引岬上泉脉分綫懸自簷注砌壘壘如貫珠霏微如
 雨露滴瀝飄灑隨風遠去其四傍耳自杖屨可及者春

白集 卷四十三
有錦繡谷花夏有石門澗雲秋有虎谿月冬有鑪峰雪
陰晴顯晦昏且含吐千變萬狀不可殫紀觀縷而言故
云甲廬山者噫凡人豐一屋萃一簣而起居其間尚不
免有驕穩之態今我爲是物主物至致知各以類至又
安得不外適內和體寧心恬哉昔永遠宗雷輩十八人
同入此山老死不反去我千載我知其心以是哉矧予
自思從幼迨老若白屋若朱門凡所止雖一日二日輒
覆簣土爲臺聚拳石爲山環斗水爲池其喜山水病癖
如此一旦蹇剝來佐江郡郡守以優容而撫我廬山以
靈勝待我是天與我時地與我所卒獲所好又何以求

焉尚以冗負所羈餘累未盡或往或來未遑寧處待予
異時弟妹婚嫁畢司馬歲秩滿出處行止得以自遂則
必左手引妻子右手抱琴書終老於斯以成就我平生
之志清泉白石實聞此言時三月二十七日始居新堂
四月九日與河南元集虛范陽張允中南陽張深之東
西二林寺長老湊朗滿晦堅等凡二十有二人具齋施
茶果以落之因爲草堂記

許昌縣令新廳壁記

民非政不乂政非官不舉官非署不立是三者相爲用
故古君子有雖一日必葺其墻屋者以是哉許昌縣居

梁鄴陳蔡間要路由於斯當建中貞元之際大軍聚於斯兵殘其民火焚其邑大田生荆棘官舍為煨燼乘其弊而為政作事者其難乎去年春叔父自徐州士曹掾選署厥邑令於是約已以清白納人以簡直立事以強毅以清白故官吏不敢侵干民以簡直故獄訟不得留干庭以強毅故軍鎮不能干于縣由是居二年民用康政用暇乃曰儲蓄邦之本命先營困倉又曰公署吏所寧命次圖廳事取材於土物取工於子來取時於農隙然後豐約量其力廣狹稱其位儉不至陋壯不至驕莊身無燥濕之憂視事有朝夕之利官由是而立政由是

而舉民由是而又建一物而三事成其孰不臆之哉嗚呼吾家世以清簡垂為貽燕之訓叔父奉而行之不敢失墜小子舉而書之亦無愧辭若其官邑之省置風物之有亡田賦之上下蓋存乎圖謀此略而不書今但記新廳之時制與叔父作為之所由也先是邑居不修屋壁無紀前賢姓字湮泯無聞而今而後請居厥位者編其年月名氏自叔父始時貞元十九年冬十月一日記

養竹記

竹似賢何哉竹本固固以植德君子見其本則思善建不拔者竹性直直以立身君子見其性則思中立不倚

白集
者竹心空空以體道君子見其心則思應用虛受者竹
節貞貞以立志君子見其節則思砥礪名行夷險一致
者夫如是故君子人多樹之為庭實焉貞元十九年春
居易以拔萃選及第授校書郎始於長安求假居處得
常樂里故關相國私第之東亭而處之明日履及于亭
之東南隅見叢竹於斯枝葉殄瘁無聲無色詢于關氏
之老則曰此相國之手植者自相國捐館他人假居繇
是筐篚者斬焉簞帚者刈焉刑餘之材長無尋焉數無
百焉又有凡草木雜生其中萃邊九專蒼鬱有無竹之
心焉居易惜其嘗經長者之手而見賤俗人之目翦棄

若是本性猶存乃芟翳薈除糞壤疏其間封其下不終
日而畢於是日出有清陰風來有清聲依依欣欣然
若有情於感遇也嗟乎竹植物也於人何有哉以其有
似於賢而人愛惜之封植之况其真賢者乎然則竹之
於草木猶賢之於衆庶嗚呼竹不能自異惟人異之賢
不能自異惟用賢者異之故作養竹記書于亭之壁以
貽其後之居斯者亦欲以聞於今之用賢者云

記畫

張氏子得天之和心之術積為行發為藝藝尤者其畫
歟畫無常工以似為工學無常師以真為師故其措一

意狀一物往往運思中與神會髣髴焉若歐和役靈於其間者時予在長安中居甚閒聞甚熟乃請觀於張張為予盡出之厥有山水松石雲霓鳥獸暨四夷六畜妓樂華蟲咸在焉凡十餘軸無動植無小大皆曲盡其能莫不向背無遺勢洪纖無遁形迫而視之有似乎水中了然分其影者然後知學在骨髓者自心術得工倖造化者由天和來張但得於心傳於手亦不自知其然而然也至若筆精之英華指趣之律度予非畫之流也不可得而知之今所得者但覺其形真而圓神和而全炳然儼然如出於圖之前而已耳張始年二十餘致功甚

近予意其生知之藝與年而長則盡必為希代寶入必為後學師恐將來者失其傳故以年月名氏記于圖軸之末云時貞元十九年清河張敦簡畫六月十日太原白居易記

記異

華州下邽縣東南三十餘里曰延平里里西南有故蘭若而無僧居元和八年秋七月予從祖兄曰暉自華州來訪予途出於蘭若前及門見婦女十許人服黃綠衣少長雜坐會語於佛屋聲聞于門兄執行左渴將就憇且求飲望其從者蕭士清未至因下馬自繫韉於門

柱舉首忽不見意其退藏於牕闥之間從之不見又意其退藏於屋壁之後從之又不見周視其四旁則堵墻環然無隙缺覆視其聚談之所則塵壤奄於檢然無足迹繇是知其非人悸具位切然大異之不敢留上馬疾驅來告予予亦異之因訊其所聞兄曰云云甚多不能殫記大抵多云王胤老於此觀其辭意若相與數相過者厥所去予舍八九里因同往訪焉果有王胤者年老卽其里人也方徙居於蘭若東百餘步葺墻屋築塲藝樹僅畢明日而入既入不浹辰而胤死不越明而妻死不逾時而胤之二子與二婦一孫死餘一子曰明進大恐

懼不知所為意新居不祥乃撤屋拔樹夜徙去遂獲全焉喜推而徵之則衆君子謀於社以亡曹婦人來焚糜竺之室信不虛矣明年秋予與兄出遊因復至是視胤之居則井湮竈夷聞然唯環墻在里人無敢居者異乎哉若然者命數耶偶然耶將所徙之居非吉土耶抑王氏有隱慝鬼得謀而誅之耶茫乎不識其由且志於佛室之壁以俟辨惑者九月七日樂天云

東林寺經藏西廊記

元和初江西觀察使韋君丹於廬山東林寺神運殿左甘露壇右建修多羅藏一所土木丹漆之外飾以多寶

相好嚴麗鄰諸鬼功雖兩都四方或未前見一切經典盡在於內蓋釋宮之天祿石渠也初藏既成南東北廊亦具獨西未作而韋君薨追今十餘年風日所飄燥雪雨所霑濕西南一隅壞有日矣僧坊衆惜之予亦惜之非不是圖才力不足暨十三年予作景雲律師塔碑成景雲弟子饋絹百匹予以法施淨財義不已有即日移用作藏西廊因請寺長老演公滿公琳公等經之寺綱維令泉靈達等成之蓋欲護前功償始願非任於布施相功德心也其集經名數與創藏由緣詳于李肇碑文此但書新作西廊而已十四年月日忠州刺史白居易

記

三遊洞序

平淮西之明年冬予自江州司馬授忠州刺史微之自通州司馬授虢州長史又明年春各祗命之郡與知退偕行三月十日叅會於夷陵翌日微之反棹送予至下牢戍又翌日將別未忍引舟上下者久之酒酣聞石間泉聲因捨棹進策步入缺峴初見石如疊如削其怪者如引臂如垂幢次見泉如瀉如灑其奇者如懸練如不絕綫遂相與維舟巖下率僕夫芟蕪刈翳梯危縋滑休而復上者凡四焉仰瞻俯察絕無人迹但水石相薄磷

磷鑿鑿跳珠。玉驚動耳目。自未訖。成愛不能去。俄而
 峽山昏。黑雲破。月出。光氣含吐。互相明滅。晶瑩玲瓏。象
 生其中。雖有敏口。不能名狀。既而通夕不寐。追且將去。
 憐奇惜別。且嘆且言。知退曰。斯境勝絕。天地間其有幾
 乎。如之何。俯通津縣。歲代寂寞。委置罕有到者。予曰。借
 此喻彼。可為長太息。豈獨是哉。豈獨是哉。微之曰。誠哉。
 是言矧吾人難相逢。斯境不易得。今兩偶於是得。無述
 乎。請各賦古調詩二十韻。書于石壁。仍命予序而紀之。
 又以吾三人始遊。故因為三遊洞。洞在峽州上二十里。
 北峰下。兩崖相廡。間欲將來好事者。知故備書其事。

遊大林寺

余與河南元集虛。范陽張允。中南陽張深之。廣平宋郁。
 安定梁必復。范陽張時。東林寺沙門法演。智滿。士堅。利
 辨。道建。神照。雲臯。息慈。寂然。凡十七人。自遺愛草堂。歷
 東西二林。抵化城。憩峰頂。登香爐峰。宿大林寺。大林窮
 遠。人迹罕到。環寺多清流。蒼石。短松。瘦竹。寺中唯板屋
 木器。其僧皆海東人。山高地深。時節絕晚。于時孟夏。月
 如正。二月。天梨桃始華。澗草猶短。人物風候。與平地聚
 落不同。初到。恍然若別造一世界者。因口號絕句云。人
 間四月芳菲盡。山寺桃花始盛開。長恨春歸無覓處。不

知轉入此中來既而周覽屋壁見蕭郎中存魏郎中弘
 簡李補闕渤三人姓名詩句因與集虛董真且曰此地
 實匡廬間第一境由驛路至山門曾無半日程自蕭魏
 李遊迄今垂二十年寂寥無繼來者嗟乎名利之誘人
 也如此時元和十二年四月九日樂天序

代書

廬山自陶謝洎十八賢已還儒風縣縣相續不絕貞元
 初有符載楊衡董隱焉亦出為文人今其讀書屬文結
 草廬於巖谷間者猶一二十人即其中秀出者有彭城
 人劉軻軻開卷慕孟軻為入秉筆慕楊雄司馬遷為文

故著異孟三卷蔡龍子十卷雜文百餘篇而聖人之旨
 作者之風雖未臻極往往而得予佐潯陽三年軻每著
 文輒來示予予知軻志不息異日必能跨符揚而攀陶
 謝軻一旦盡賣所著書及所為文訪予告行欲舉進士
 予方淪落江海不足以發軻事業又羸病無心力不能
 徧致書於臺省故人因援紙引筆寫簡中事授軻且曰
 子到長安持此札為予謁集賢庾三十二補闕翰林杜
 十四拾遺金部元八員外監察牛二侍御史有蕭正字
 藍田楊主簿兄弟彼七八君子皆予文友以予愚直嘗
 信其言苟于今不我欺則子之道庶幾光明矣又欲使

平生故人知我形體已悴志氣已憊獨好善喜才之心未死去矣持此代書三月三日樂天白

送侯權秀才序

貞元十五年秋予始舉進士與侯生俱為宣城守所貢明年春予中春官策既入仕凡歷四朝才朽命剝寒賸不暇去年冬蒙不次恩遷尚書郎掌誥西掖然青衫未解白髮已多矣時予尚為京師旅人見除書走來賀予因從容問其官名則曰無得矣問其生業則曰無加矣問其僕乘囊資則曰日消月賸子全矣問別來幾何時則曰二十有三年矣嗟乎侯生當宣城別時才文志氣

我爾不相下今予猶小得遇子卒無成由子而言予為不遇矣嗟乎侯生命實為之謂之何哉言未竟又有行色且曰欲謁東諸侯恐不知我者多請一言以寵別予方直閣慨然竊書命筆以序之爾

冷泉亭記

東南山水餘杭郡為最就郡言靈隱寺為尤由寺觀冷泉亭為甲亭在山下水中央寺西南隅高不倍尋廣不累丈而撮奇得要地搜勝槩物無遁形春之日吾愛其草薰薰木欣欣可以導和納粹暢人血氣夏之夜吾愛其泉淅淅風泠泠可以蠲煩解醒起人心情山樹為蓋

巖石為屏雲從棟生水與階平坐而翫之者可濯足於
 牀下臥而狎之者可壅釣於枕上矧又潺湲潔澈粹冷
 柔滑若俗士若道人眼耳之塵心舌之垢不待盥滌見
 輒除去潛利陰益可勝言哉斯所以最餘抗而甲靈隱
 也杭自郡城抵四封叢山複湖易為形勝先是領郡者
 有相里君造虛白亭有韓僕射臯作候仙亭有裴庶子
 棠棣作觀風亭有盧給事元輔作見山亭及右司郎中
 河南元稹最後作此亭於是五亭相望如指之列可謂
 佳境殫矣能事畢矣後來者雖有敏心巧目無所加焉
 故吾繼之述而不作長慶三年八月十三日記

卷終

白氏長慶集卷第四十四

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

書凡三首

與楊虞卿書

師臯足下自僕再來京師足下守官鄆縣吏職拘絆相
 見甚稀凡半年餘與足下開口而笑者不過三四及僕
 左降詔下明日而東足下從城西來抵昭國坊已不及
 矣走馬至涯水才及一執手憫然而訣言不及他邇來

雖手札三往來亦不過問道途報捷否而已鬱結之志曠然未舒思欲一陳左右者久矣去年六月盜殺右丞相於通衢中逆血髓磔髮肉所不忍道合朝震慄不知所云僕以為書籍以來未有此事國辱臣死此其時耶苟有所見雖吠畝阜隸之臣不當默默况在班列而能勝其痛憤耶故武相之氣平明絕僕之書奏日午入兩日之內滿城知之其不與者或誣以偽言或構以非語且浩浩者不酌時事大小與僕言當否皆曰丞郎給舍諫官御史尚未論請而贊善大夫何反憂國之甚也僕聞此語退而思之贊善大夫誠賤冗耳朝廷有非常事

即日獨進封章謂之忠謂之憤亦無媿矣謂之妄謂之狂又敢逃乎且以此獲辜顧何如耳况又不以此為罪名乎此足下與崔李元庾輩十餘人為我悒悒鬱鬱長太息者也然僕始得罪於人也竊自知矣當其在近職時自惟賤陋非次寵擢夙夜腴愧思有以稱之性又愚昧不識時之忌諱凡直奏密啓外有合方便聞於上者稍以歌詩導之意者欲其易入而深誠也不我同者得以為計媒藥之辭一發又安可君臣之道聞自明曰其心乎加以握兵於外者以僕潔慎不受賂而憎秉權於內者以僕介獨不附已而忌其餘附麗之者惡僕獨異

又信信信吠聲唯恐中傷之不獲以此得罪可不悲乎
 然而察友益相重交游益相信信於近而不信於遠亦
 何恨哉近者少遠者多多者勝少者不勝又其宜矣師
 臯僕之是言不發於他人獨發於師臯師臯知我者豈
 有愧於其間哉苟有愧於師臯固是言不發矣且與師
 臯始於宣城相識迨于今十七八年可謂故矣又僕之
 妻即足下從父妹可謂親矣親如是故如是人之情又
 何加焉然僕與足下相知則不在此何者夫士大夫家
 閨門之內朋友不能知也閨門之外姻族不能知也必
 待友且姻者然後周知之足下視僕莅官事擇交友接

賓客何如哉又視僕撫骨肉待妻子馭僮僕又何如哉
 小者近者尚不敢不盡其心况大者遠者乎所謂斯言
 無愧而後發矣亦猶僕之知師臯也師臯孝敬友愛之
 外可略而言足下未應舉時嘗充賢良直言之賦其所
 對問志磊磊而詞諤諤雖不得第僕始愛之及與獨孤
 補闕書讓不論事與盧侍郎書請不就職與高相書諷
 成致仕之志志益大而言益遠而僕愛重之心繇是加
 焉近者足下與李弘慶友善弘慶客長安中貧甚而病
 亟足下為逆致其母安慰其心自損衣食以續其醫藥
 甘旨之費有年歲矣又足下與崔行儉游行儉非罪下

白集 卷四十四
獄足下意其不幸及於流竄勅下之日躬俟於御史府
門而行李之具養活之物崔生顧其旁一無闕者其餘
奉寡姊親護其夫喪撫孤甥誓畢其婚嫁取貴人子爲
婦而禮法行於家由甲乙科入官而吏聲聞於邑凡此
者皆可以激揚積俗表正士林斯僕所以嚮慕勤勤豈
敢以骨肉之姻形骸之舊爲意哉然足下之美如此而
僕側聞蚩蚩之徒不悅足下者已不少矣但恐道日長
而毀日至位益顯而謗益多此伯寮所以愬仲由季孫
所以毀夫子者也昔衛玠有云人之不逮可以情怨非
意相加可以理遣故至終身無喜愠色僕雖不敏常佩

此言師臯人生未死見于變萬化若不情怨於外理遣
於中欲何爲哉欲何爲哉僕之是行也知之久矣自度
命數亦其宜然凡人情通達則謂由人窮塞而後信命
僕則不然十年前以固陋之姿瓊屑之藝與敏手利足
者齊驅豈合有所獲哉然而求名而得名求祿而得祿
人皆以爲能僕獨以爲命命通則事偶事偶則幸來幸
之來尚歸之於命不幸之來也捨命復何歸哉所以
不怨天下不尤人者寔如此也又常照鏡或觀寫真自
相形骨非富貴者必矣以此自決益不復疑故寵辱之
來不至驚怪亦足下素所知也今且安時順命用遣歲

月或免罷之後得以自由浩然江湖從此長往死則葬魚鼈之腹生則同鳥獸之羣必不能與措聲攫利者推量其分寸矣足下輩無復見僕之光塵於人寰間也多謝故人勉樹令德粗寫鄙志兼以為別居易頓首

與陳給事書

正月日鄉貢進士白居易謹遣家僮奉書獻於給事閣下伏以給事門屏間請謁者如林獻書者如雲多則多矣然聽其辭一辭也觀其意一意也何者率不過有望於吹噓翦拂耳居易則不然今所以不請謁而奉書者但欲貢所誠實所疑而已非如眾士有求於吹噓翦拂

也給事得不獨為之少留意乎大凡自號為進士者無賢不肖皆欲求一第成一名非居易之獨慕眾既慕之所以切不自察嘗勤苦學文迄今十年始獲一貢每見進士之中有一舉而中第者則欲勉狂簡而進焉又見有十舉而不第者則欲引鴛鴦而退焉進退之宜固昭昭矣而遇者自惑於趣舍何哉夫蘊奇挺之才亦不自保其必勝而一上得第者非他也是主司之明也抱瓊細之才亦不自知其妄動而十上下第者亦非他也是主司之明也豈非知入易而自知難耶伏以給事天下文宗當代精鑒故不揆淺陋敢布腹心居易鄙人也上

白集 卷四十四 五
無朝廷附離之援次無鄉曲吹煦之譽然則孰為而來
哉蓋所仗者文章耳所望者主司至公耳今禮部高侍
郎為主司則至公矣而居易之文章可進也可退也切
不自知之欲以進退之疑取決於給事給事其能捨之
乎居易聞神著靈龜者無常心苟叩之者不以誠則已
若以誠叩之必以信告之無貴賤無大小而不乏應也
今給事鑒如水鏡言為著龜邦家大事咸取決於給事
豈獨遺其微小乎謹獻雜文二十首詩一百首伏願俯
察悃誠不遺賤小退公之暇賜精鑒之一加焉可與進
也乞諸一言小子則磨鉛策蹇騁力於進取矣不可進

也亦乞諸一言小子則息機歛迹甘心於退藏矣進退
之心交爭於胸中者有日矣幸一言以蔽之旬日之間
敢佇報命塵穢聽覽若奪氣褫魄之為者不宣居易謹
再拜

為人上宰相書

二月十九日某官某乙謹拜手奉書獻於相公執事書
曰古人云以水投石至難也某以為未甚難也以卑下
尊以賤合貴斯為難矣何者夫尊貴人之心堅也強也
不轉也甚於石焉卑賤人之心柔也弱也自下也甚於
水焉則合之難也豈不甚於水投石哉然則自古及今

往往有合者又何哉此蓋以心遇心以道濟道故也苟
心相見道相通則水反為石石反為水則其合之易也
又甚乎以石投水焉何者石之投水也猶觸之有聲受
之有波心道之相得也則貴者不知其貴也賤者不知
其賤也當其冥同訢合之際但脗武粉切然而已矣其合
之易也豈不甚於石投水哉噫厥道廢墜不行於代久
矣故貴者自貴耳賤者自賤耳維同心同道不求相合
也今某之心與相公之心愚智不侔也今某之道與相
公之道小大不倫也矧又尊卑貴賤之勢相懸如石焉
如水焉而欲強至難為至易無乃不可乎然則知其不

可而為之者抑有由伏以相公方今佐裁成之道當具
瞻之初竊希變天下水石之心自相公始也通天下貴
賤之道自某始也不然者夫豈不自知其狂進妄動哉
伏少留聽而畢辭焉幸甚幸甚伏觀先皇帝之知遇
相公也雖古君臣道合者無以加也然竟不與大位不
授太權不盡行相公之道者何哉識者以為先皇父子
孝慈之閒亦古未有也蓋先皇所以輒已知人之明用
賢之功致理之德以留賜今上也亦猶太宗黜李勣而
使高宗寵用之也故今上在諒陰而特用也相公自郎
官而特拜也推此二者有以見識者之言信矣斯則先

皇知遇之恩貽燕之念今上速用之旨倚賴之誠相公
 寵擢之榮託寄之重自國朝以來三者兼之甚鮮矣故
 某竊惟相公自拜命以來八九日得食不暇飽寢不暇
 安行則懔然居則惕然思所以答先皇之知副今上之
 用先天下之望哉某竊以為必然矣况今主上肇撫蒼
 生初嗣洪業雖物不改舊而令宜布新是以百辟傾心
 悽悽盧侯切然以待主上之政也萬姓注目專專然以望
 主上之令也四夷側耳顛顛然以聽主上之風也豈直
 若此而已哉蓋待其政者勤墮邪正繫其中焉望其令
 者憂喜親疎生其中焉聽其風者畏侮動靜出其中焉

卷四十五
 十八枝參照

而將來理亂之根安危之源盡在於三者之中矣如此
 則相公得不匡輔其政緝熙其令宣和其風乎然則匡
 輔緝熙宣和之道某雖不敏嘗聞於師焉曰天子之耳
 待宰相之耳而後聰也天子之目待宰相之目而後明
 也天子之心識待宰相之心識而後聖神也宰相之耳
 待天下之耳而後聰也宰相之目待天下之目而後明
 也宰相之心識待天下之心識而後能啓發聖神也然
 則下取天下耳目心識上以為天子聰明神聖者此宰
 相之本職也而為匡輔緝熙宣和之道也若宰相唯以
 兩耳聽之兩目視之下心思之則朝廷之得失豈盡知

見乎必不盡也而况于天下之得失乎宰相之耳目得
 聰明乎必未也而况于上以為天子聰明聖神乎然則
 天下聰明心識取之豈無其道耶必有也在于知與不
 知行與不行耳噫自開元已來斯道寢衰鮮能行者自
 貞元以來斯道寢微鮮能知者豈唯不知乎不行乎又
 將背古道而馳者也何者古者宰相以危言危行扶危
 持顛為心今則敏行遜言全身遠害而已矣古者宰相
 以接士為務今則不接賓客而已矣古者宰相以開閣
 為名今則鎖其第門而已矣致使天下之聰明盡委棄
 於草木中焉天下之心識盡沈沒於泥土間焉則天下

聰明心識萬分之中宰相何嘗取得其一分哉是故寵
 益崇而謗益厚歲彌久而愧彌深至乃上負主恩下斂
 人怨行止寢食自有慙色者夫豈非不得天下聰明心
 識之所致耶然則為宰相者得不思易其轍乎是以聰
 明損於上則正直銷於下畏忌慎默之道長公議忠謹
 之路塞朝無敢言之士庭無執咎之臣自國及家寢以
 成弊故父訓其子曰無介直以立仇敵兄教其弟曰無
 方正以賈悔尤先達者用以養身後進者資而取仕日
 引月長熾然成風識者腹非而不言愚者心兢而是效
 至使天下有目者如瞽也有耳者如聾也有口者如含

鋒刃也如此則上之得失下之利病雖欲匡救何由知之嗟乎自古以來斯道之弊恐未甚於今日也然則為宰相者得不思變其風乎是以慎息積於中則政事廢於表因循苟且之心作強毅久大之性虧反譁率職而舉者不達於時宜當官而行者不通於事變故殿最之書雖具而不實黜陟之法雖備而不行欲望惡者懲善者勸或恐難矣古之善為宰相者豈盡得賢而用之乎豈盡知不肖而去之乎蓋在於秉鈞軸之樞握刀尺之要刻邪為正削觚為圓能使善之必遷不謂善之盡有能使惡之必改不謂惡之盡無成此功者無他懲勸之

所致耳然則為宰相者得不思提其綱使羣目皆自張乎是以懲勸息於此則賢能乏於彼故岳鎮闕而不知所取臺省空而不知所求今則尚書六司之官暨千百執事者大凡要劇者多虛其位閒散者咸備其官或曰所以難其人重其祿也嗟乎徒知難其人而闕之不知邦政日歸於下吏也徒知重其祿而愛之不知稍食且費於冗員也損益利害豈不明哉古之善為宰相者虛其懷直其氣苟有舉一言者必從而索之苟有薦一言者必隨而用之然後明察否臧精考真偽得人者行進賢之賞謬舉者坐不當之辜自然審輪轅以相求謹關

梁以相保故才無乏用國無廢官豈可疑所舉之未精而反失其善重所任而不苟而反廢其官與其廢官寧其虛授與其失善寧其謬升但在乎明覈是非必行賞罰則謬升虛授當自辨焉然則為宰相者得不思振其領使眾毛皆舉乎是以廢政闕於內則庶事數於外至使天下之戶口日耗天下之士馬日滋游手於道途市井者不知歸託足於軍籍釋流者不知反計數之吏日進聚歛之法日興田疇不闢而麥禾之賦日增桑麻不加而布帛之價日賤吏部則士人多而官員少姦濫日生諸使則課利少而羨餘多侵削且甚舉一知十可勝

言哉况今方域未甚安邊陲未甚靜水旱之災不戒兵戎之動無期然則為宰相者得不圖將來之安補既往之敗乎若相公用天下之目觀而救之夫豈無最遠之見乎用天下之心圖而濟之夫豈無最長之策乎策之最長者見之最遠者在相公鑒而取之誠而行之而已取之也行之也今其時乎為時之用大矣哉古者聖賢有其才無其位不能行其道也有其才有其位無其時亦不能行其道也必待有其才有其位有其時然後能行其道焉其竊見相公曩時制策對中論風化澆淳之源明天人交感之道陳兵災救療之術可謂有其才矣

又伏見今月十一日制詞云其代予言允屬良弼必能
 形四方之風成天下之務可謂有其時矣今相公有其
 才○有○其○位○有○其○時○則○行○道○由○已○而○由○道○乎○哉○某○又○聞○一
 往○而○不○可○追○者○時○也○故○聖○賢○其○惜○焉○方○今○拭○天○下○之○目
 以○觀○主○上○之○作○為○也○側○天○下○之○耳○以○聽○相○公○之○舉○措○也
 如○此○則○相○公○出○一○言○不○終○日○而○必○聞○於○朝○野○主○上○發○一
 令○不○浹○辰○而○必○達○於○華○夷○蓋○主○上○輯○百○辟○和○萬○姓○服○四
 夷○之○時○在○於○此○時○矣○相○公○充○人○望○代○天○工○報○國○之○恩○正
 在○於○今○日○矣○或○者○曰○君○臣○之○道○至○大○也○可○以○漸○合○不○可
 以○速○合○也○天○下○之○化○至○大○也○可○以○漸○行○不○可○以○速○行○也

賢人之事業至大也行之可以枉尺而直尋也其以為
 殆不然矣夫時之變事之宜其間不容息也先之太過
 後之則不及故時未至聖賢不進而求時既來聖賢不
 退而讓蓋得之則不啻乎事半而功倍也失之則不啻
 乎事倍而功半也嗟乎或者徒知漸合其道而不知啓
 沃之時失於漸中矣徒知漸行其化而不知燮理之時
 失於漸中矣徒知枉尺而直尋而不知易失於時則難
 生於漸中雖枉尋不能直尺矣近者宰相道不行化不
 成事業不光明率由乎有志於漸矣請以前事明之某
 嘗聞太宗顧謂羣臣曰善人為邦百年然後能勝殘去

殺當今大亂之後將求致理寧可造次而望乎魏文貞
曰不然夫亂後易理猶饑人易食也若聖哲施化人應
如響期月而可信不為難三年成功猶譚其晚太宗深
納其言時封德彝輩共非之曰不可三代以後人漸澆
訛皆欲理而不能豈能理而不欲魏徵書生不識時務
信其虛說必亂國家於是太宗卒從文貞之言力行不
徇三數年間天下大安戎狄內附太宗曰惜哉不得使
封德彝見之斯則得其時行其道不取於漸之明效也
况今日之天下豈弊於武德之天下乎相公之事業豈
後於文貞之事業乎在於疾行而已矣所以主上踐祚

未及十日而寵命加於相公者惜國家之時也相公受
命未及十日而某獻於執事者惜相公之時也夫欲行
大道樹大功貴其速也蓋明年不如今年明日不如今
日矣故孔子曰日月逝矣歲不我與此言時之難得而
易失也伏惟相公惜其時之易也而不失焉慮其漸之
難也而不取焉抑又聞濟時者道也行道者權也扶權
者寵也故得其位不可一日無其權得其權不可一日
無其寵然則取權有術也求寵有方也蓋竭其力以舉
職而權必自歸忘其身以徇公而寵必自至權歸寵至
然後能行其道焉伏惟相公詳之而不忽也抑又聞不

棄死馬之骨者然後良驥可得也不棄狂夫之言者然後嘉謨可聞也苟某管見之中有可取者俯而取之苟芻言之中有可採者俛而採之則知之者必曰如某之見猶且不棄况愈於某之徒歟則天下情通達識之士得不比肩而至乎聞之者必曰如某之言猶且不棄况愈於某之徒歟則天下蹇諤敢言之士得不繼踵而來乎伏惟相公試垂意焉則天下之士幸甚某遊長安僅十年矣足不踐相公之門目不識相公之面名不聞相公之耳相公視某何為者哉豈非介者耶猶者耶今一旦卒然以數千言塵瀆執事者又何為哉實不自揆欲

以區區之聞見裨相公聰明萬分之一分也又欲以濟天下顛頓之人死命萬分之一分也相公以為如何

白氏長慶集卷第四十四終

